



REPUBLIKA E SHQIPËRISË

KUVENDI

Komisioni për Çështjet Ligjore, Administratën Publike dhe të Drejtat e Njeriut

Tiranë, më 17.10. 2018

RAPORT

MBI VLERËSIMIN E KANDIDATËVE PËR ANËTAR TË KOMISIONIT TË PAVARUR PËR KOORDINIMIN, MONITORIMIN DHE NDJEKJEN E ZBATIMIT TË LIGJIT NR. 115/2016 “PËR ORGANET E QEVERISJES SË SISTEMIT TË DREJTËSISË”

- Hyrje

Kuvendi i Shqipërisë, me Vendimin nr.74/2018 të datës 31.5.2018, ka miratuar rregullat për krijimin e Komisionit të Pavarur për Koordinimin, Monitorimin dhe ndjekjen e zbatimit të ligjit nr. 115/2016 “Për organet e qeverisjes së sistemit të drejtësisë”, si dhe kushtet dhe kriteret që duhet të plotësojnë anëtarët e këtij komisioni.

Komisioni i Pavarur do të monitorojë si dhe do të ndjekë ecurinë e zbatimit të detyrimeve ligjore nga institucionet respektive, brenda afateve ligjore, si dhe do të bëjë koordinimin midis institucioneve dhe organeve që ngarkohen me zbatimin e ligjit 115/2016.

Kuvendi, në përfundim të procedurave të aplikimit dhe të vlerësimit të kandidatëve, në seancën e datës 20.9.2018, me Vendimin nr.97, ka zgjedhur 4 anëtarë të Komisionit të Pavarur për koordinimin, monitorimin dhe ndjekjen e zbatimit të ligjit nr. 115/2016. Meqenëse nuk u plotësua numri i anëtarëve të këtij komisioni, Komisioni për Çështjet Ligjore, Administratën Publike dhe të Drejtat e Njeriut vendosi të shpallë hapjen e procedurës së aplikimit për një vend vakant për anëtar të Komisionit të Pavarur për koordinimin, monitorimin dhe ndjekjen e zbatimit të ligjit nr. 115/2016.

- Shqyrtimi i kandidaturave nga Komisioni për Çështjet Ligjore, Administratën Publike dhe të Drejtat e Njeriut

Bazuar në Vendimin nr.74, datë 31.5.2018 të Kuvendit, në përfundim të afatit të parashikuar në shpalljen për hapjen e procedurës së aplikimit për një vend vakant për anëtar të Komisionit të Pavarur për koordinimin, monitorimin dhe ndjekjen e zbatimit të ligjit nr. 115/2016, paraqitën shprehjen e interesit dhe dokumentacionin shoqërues kandidatët:

1. Besnik Kaçurri
2. Muhamed Kavaja
3. Petrit Plloçi

Komisioni për Çështjet Ligjore, bazuar në pikën XII të Vendimit nr.74, datë 31.5.2018 të Kuvendit, në datën 17.10.2018 zhvilloi një seancë dëgjimore publike për të bërë vlerësimin e meritës së kandidatëve dhe të përmbushjes së kushteve dhe kriterëve për t'u zgjedhur.

Sipas vendimit nr.74, datë 31.5.2018 të Kuvendit, anëtar i Komisionit të Pavarur mund të zgjidhet shtetasi shqiptar që përmbush këto kushte:

- a) të ketë zotësi të plotë për të vepruar;
- b) të ketë mbaruar arsimin e lartë juridik, Diplomë e Nivelit të Dytë;
- c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;
- ç) të mos jetë në procedim penal dhe të mos jetë dënuar me burgim për kryerjen e një vepre penale;
- d) të mos jetë larguar nga detyra për shkaqe disiplinore dhe të mos ketë masë disiplinore në fuqi;
- dh) të mos jetë larguar nga detyra e gjyqtarit apo prokurorit, me dorëheqje, në kuadër të procesit të rivlerësimit kalimtar të gjyqtarëve dhe prokurorëve, sipas legjislacionit në fuqi.

2. Kandidati që përmbush kushtet e parashikuara në pikën 1, duhet të plotësojë edhe këto kriterë:

- a) të ketë përvojë pune jo më pak se 15 vjet në profesion si jurist, gjyqtar, prokuror, avokat, profesor ose lektor i së drejtës, apo jurist në nivele drejtuese në administratën publike;
 - b) të ketë një veprimtari të njohur në fushën e së drejtës;
 - c) të jetë vlerësuar për aftësitë profesionale dhe integritetin etik e moral.
3. Plotësimi i kriterëve të mësipërme vlerësohet në bazë të:
- a) vjetërsisë në profesion;
 - b) përvojës së veçantë të kandidatit në një fushë të caktuar të së drejtës;
 - c) kualifikimeve pasuniversitare dhe trajnimeve në fushën e së drejtës;
 - ç) treguesve shkencorë, ku përfshihen botimet dhe artikujt shkencorë në fushën juridike.

Në përfundim të seancës dëgjimore dhe bazuar në dokumentacionin e paraqitur nga kandidatët për përmbushjen e kushteve ligjore, të dhënat për secilin nga kandidatët janë si më poshtë:

1. **Besnik Kaçurri**, është shtetas shqiptar, i diplomuar në vitin 1978, në Fakultetin e Drejtësisë, Universiteti i Tiranës. Nga CV personale e paraqitur rezulton se kandidati plotëson kriterin e 15 viteve punë si jurist, si dhe ka deklaruar nuk ka asnjë masë disiplinore ndaj tij. Kandidati ka pasur një karrierë të gjatë si gjyqtar, dhe më pas si ndihmës ligjor në Gjykatën e Lartë. Aktualisht ushtron profesionin e avokatit.

Me vetëdeklarim, kandidati ka paraqitur deklaratat në zbatim të ligjit nr.138/2015 “Për garantimin e integritetit të personave që zgjidhen emërohen ose ushtrojnë funksione publike” dhe të ligjit 45/2015 “Për të Drejtën e Informimit mbi Dokumentet e ish – Sigurimit të Shtetit të Republikës Popullore Socialiste të Shqipërisë”, nga ku rezulton se nuk është në kushtet e pengesës ligjore për të kandiduar.

Vlerësimi: Kandidati plotëson formalisht kushtet dhe kriteret për t’u zgjedhur anëtar i Komisionit të Pavarur.

2. **Z.Muhamed Kavaja**, është shtetas shqiptar, i diplomuar në Fakultetin e Drejtësisë, Universiteti i Tiranës, në vitin 1996. Nga CV personale e paraqitur rezulton se kandidati plotëson kriterin e 15 viteve punë si jurist, si dhe ka deklaruar se nuk ka asnjë masë disiplinore ndaj tij. Aktualisht është kryeauditues pranë Kontrollit të Lartë të Shtetit. Nuk rezulton që kandidati të ketë qenë gjyqtar ose prokuror, pra nuk i është nënshtruar procesit të rivlerësimit dhe ndonjë masë disiplinore si pasojë e tij.

Kandidati ka deklaruar se nuk ka ushtruar funksione politike në administratën publike dhe nuk ka mbajtur pozicione drejtuese në parti politike gjatë 10 viteve të fundit nga data e kandidimit.

Nga dokumentacioni rezulton se ndaj tij nuk ka një procedim penal në proces apo të jetë dënuar për kryerjen e një veprë penale.

Me vetëdeklarim, kandidati ka paraqitur deklaratat në zbatim të ligjit nr.138/2015 “Për garantimin e integritetit të personave që zgjidhen emërohen ose ushtrojnë funksione publike” dhe të ligjit 45/2015 “Për të Drejtën e Informimit mbi Dokumentet e ish – Sigurimit të Shtetit të Republikës Popullore Socialiste të Shqipërisë”, nga ku rezulton se nuk është në kushtet e pengesës ligjore për të kandiduar.

Vlerësimi: Kandidati plotëson kushtet dhe kriteret formale për t’u zgjedhur anëtar i Komisionit të Pavarur.

3. **Z.Petrit Plloçi**, është shtetas shqiptar, i diplomuar në vitin 1983, në Fakultetin e Drejtësisë, Universiteti i Tiranës. Nga CV personale rezulton se kandidati plotëson kriterin e 15 viteve punë si jurist, si dhe nuk rezulton asnjë masë disiplinore ndaj tij. Kandidati nuk i është nënshtruar procesit të rivlerësimit dhe ndonjë masë disiplinore si pasojë e tij.

Kandidati ka një karrierë të gjatë në gjyqësor, duke filluar si gjyqtar në gjykatat e shkallës së parë, dhe më pas anëtar i Gjykatës së Lartë si dhe anëtar i Gjykatës Kushtetuese.

Gjithashtu, kandidati është angazhuar si ekspert në grupet e punës të Reformës në Drejtësi. Ka eksperiencë mësimdhënieje në Shkollën e Magjistraturës, si dhe ka publikuar artikuj shkencorë dhe ka botuar dhe përkthyer disa libra në fushën e të drejtës kushtetuese.

Me vetëdeklarim, kandidati ka paraqitur deklaratat në zbatim të ligjit nr.138/2015 “Për garantimin e integritetit të personave që zgjidhen emërohen ose ushtrojnë funksione publike”

dhe të ligjit 45/2015 “Për të Drejtën e Informimit mbi Dokumentet e ish – Sigurimit të Shtetit të Republikës Popullore Socialiste të Shqipërisë”, nga ku rezulton se nuk është në kushtet e pengesës ligjore për të kandiduar.

Vlerësimi: Kandidati plotëson kushtet dhe kriteret për t’u zgjedhur anëtar i Komisionit të Pavarur.

- Vlerësimi dhe votimi i kandidatëve nga Komisioni për Çështjet Ligjore, Administratën Publike dhe të Drejtat e Njeriut

Komisioni për Çështjet Ligjore, Administratën Publike dhe të Drejtat e Njeriut, bazuar në pikën XII të Vendimit nr.74, datë 31.5.2018 të Kuvendit, filloi shqyrtimin dhe vlerësimin e meritës së kandidatëve si dhe të përmbushjen së kriterëve për t’u zgjedhur anëtarë të Komisionit të Pavarur të Monitorimit.

Relatorja, znj.Klotilda Bushka, paraqiti para Komisionit, për secilin nga kandidatët, vlerësimin lidhur me përmbushjen e kriterëve formale për të qenë anëtarë të Komisionit të Pavarur të Monitorimit. Në vlerësimin e relatores, të gjithë kandidatët plotësojnë kriteret formale të parashikuara në Vendimin nr.74 të Kuvendit, dhe nuk ndodhen në kushtet e pengesës ligjore për të kandiduar.

Gjatë diskutimit për kandidaturat dhe vlerësimit të tyre, deputetët morën në konsideratë dhe prezantimin e kandidatëve gjatë seancës dëgjimore.

Bazuar në procedurën e parashikuar në Vendimin nr.74 të Kuvendit, Kryetari i Komisionit hodhi për votim, emër për emër, sipas rendit alfabetik të emrit, të gjithë kandidatët. Në përfundim të votimit, rezultuan të votuar më shumicën e votave të anëtarëve të pranishëm, kandidatët:

1. Besnik Kaçurri
2. Muhamed Kavaja
3. Petrit Plloçi

Pas përfundimit të procesit të votimit, Komisioni për Çështjet Ligjore miratoi listën përfundimtare me emrat e 3 kandidatëve, dhe vendosi përcjelljen e kandidaturave për votim seancës plenare, në përputhje me parashikimet e pikës XIII të Vendimit nr.74, datë 31.5.2018 të Kuvendit.

R E L A T O R E

KLOTILDA BUSHKA

KRYETAR

ULSI MANJA